

續資治通鑑

冊十

續資治通鑑卷第四十

賜進士及第兵部尚書兼都察院右都御史總督湖北湖南等處地方軍務兼理糧餉世襲二等輕車都尉畢沅編集

宋紀四十

起旃蒙大淵獻正月盡彊圉赤奮若七月凡二十一年有奇

仁宗體天法道極功全德神文聖武睿哲明孝皇帝

景祐二年

遼重熙四年

春正月壬寅徙江東轉運使蔣堂

爲淮南轉運使兼發運司事堂在淮南歲薦部吏二

百員曰十得二三亦足報國矣

以度支判官工部

郎中許申爲江南東路轉運使凡鑄銅錢十分其劑

銅居六分鉛錫居三分皆有奇贏此其大法也申在

三司乃建議以藥化鐵雜鑄銅居三分鐵居六分費

省而利厚朝廷從之卽詔申用其法鑄於京師然大

率鑄錢雜鉛錫則其液流速而易成雜以鐵則流澀而多不就工人苦之初命申鑄萬緡逾月才得萬錢申自度言無效乃求爲江東轉運使欲用其法鑄於江州朝廷又從之詔申就江州鑄百萬緡無漏其法中外知其非是而執政主之以爲可行然卒無成功先是鹽鐵副使任布請鑄大錢一當十而申欲以銅鐵雜鑄朝廷下其議於三司程琳奏曰布請用大錢是誘民盜鑄而陷之罪唐第五琦嘗用此法訖不可行申欲以銅鐵雜鑄理恐難成姑試之申詐得售蓋琳亦主其議故也

〔攷異〕李燾曰琳傳載此事於天聖五年以前誤也當是景祐元年五月琳再爲三司使

時王子融云布請鑄大錢行之京城程琳集官議子融時判度支曰今軍營半在城外獨行大錢城中可也事遂寢與琳傳異今不取

天章閣待制孫祖德言僞銅法所禁而官自爲之是教民欺也固爭之不從遂出知兗州 癸丑置邇英

延義二閣寫尚書無逸篇於屏邇英在迎陽門之北

東向延義在崇政殿之西北向

（攷異）宋史本紀癸丑置邇英延義二閣寫尚書無

逸篇於屏通鑑續編云詔蔡襄寫今從長編

是日御延義閣召輔臣觀盛度進

讀唐書賈昌朝講春秋既而曲宴崇政殿遼以奚

六部太尉耶律罕留

舊作韓留今改

爲北面林牙罕留性不

苟合爲樞密使蕭諧哩

舊作解里今改

所忌遼主初欲召用

諧哩言其目疾不能視遂止至是召見謂曰朕欲早

用卿聞有疾故待之至今罕留對曰臣昔有目疾才

數月耳然亦不至於昏第臣驚拙不能事權貴是以

不獲早覩天顏非陛下聖察則愚臣豈有今日邪詔

進述懷詩遼主嘉歎方將大用卒二月燕肅等上

攷定樂器并見工人戊午御延福宮臨閱奏郊廟五

十一曲因問李照樂何如照對樂音高二律擊黃鍾

則爲仲呂擊夾鍾則爲夷則是冬興夏令春召秋氣
蓋五代樂壞王朴勑意造律準不合古法又編鐘鐸
鐘無大小輕重厚薄長短之差銅錫不精相傳以爲
唐舊鐘亦有朴所製者昔軒轅氏命伶倫截竹爲律
復令神瞽協其中聲然後聲應鳳鳴而管之參差亦
如鳳翅其樂傳之亶古不刊之法也願聽臣依神瞽
律法試鑄編鐘一虞可使度量權衡協和詔許之仍
就錫慶院鑄 庚申太常博士直史館宋祁上大樂
圖義二卷 帝未有儲嗣取汝南郡王允讓子宗實
入宮中皇后拊鞠之時生四年矣 丁卯知兗州范
諷責授武昌行軍司馬廣東轉運使龐籍降授太常
博士知臨江軍光祿寺丞館閣校勘宋城石延年落
職通判海州仍下詔以諷罪申飭中外先是籍爲御

史數劾諷宰相李迪右諷弗治反左遷籍籍既罷益
追劾諷不置且言諷放縱不拘禮法苟釋不治則敗
亂風俗會諷亦請辨乃詔卽南京置獄遣淮南轉運
使黃總提點河北刑獄張嵩訊之籍坐所劾諷有不
如奏法當免諷當以贖論諷不待論報擅還兗州呂
夷簡疾諷詭激且欲因諷以傾迪故特寬籍而重貶
諷凡與諷善者皆黜削延年嘗上書請莊獻太后還
政諷任中丞欲引延年爲屬延年力辭之竟坐免人
謂籍劾諷不置實夷簡陰教之 戊辰工部尙書平
章事李迪罷爲刑部尙書知亳州先是帝御延和殿
召呂夷簡宋綬決范諷獄以迪素黨諷不召迪惶恐
還第翼日遂罷相然迪性淳直實不察諷之多誕也
以樞密使王曾爲右僕射兼門下侍郎平章事集

賢殿大學士參知政事王隨樞密副使李諮並知樞密院事參知政事宋綬爲樞密副使給事中蔡齊翰林學士承旨盛度爲參知政事樞密副使王德用御史中丞韓億並同知樞密院事 己巳改李迪知相

州庚午復改授資政殿大學士留京師仍班三司使上 庚辰降李迪爲太常卿知密州始迪再入相自以受不世遇知無不爲及呂夷簡繼入中書事頗專制心忌迪潛短之於帝迪不悟旣坐范諷姻黨罷政怨夷簡因奏夷簡私交荆王元儼嘗爲補門下僧惠清爲守闕鑒義夷簡請辨帝遣知制誥胥偃度支副使張傳卽訊乃迪在中書時所行夷簡以齋祠不預迪慚懼待罪故貶然補惠清實夷簡意迪但行文書顧謂夷簡獨私荆王蓋迪偶忘之它日語人曰吾自

以爲宋璟而以夷簡爲姚崇不知其待我乃如是也

以右諫議大夫知天雄軍杜衍爲御史中丞衍奏

中書樞密古之三事大臣所爲坐而論道者也止隻

日對前殿何以盡天下之事宜迭召見賜坐便殿以

極獻替月不過數四足矣若末節細務有司之職耳

陛下何必親決 先是遼主爲太子時納駙馬都尉

蕭實哩舊作匹里今改之女爲妃及卽位立爲后未幾以罪

降爲貴妃秦王蕭孝穆有長女姿貌端麗自遼主初

卽位始入宮逾年生子洪基蕭氏性寬容遼主益重

之三月乙酉朔冊爲皇后（攷異）遼史興宗紀景福元年與
喂蕭氏始入宮蓋卽仁懿入宮之

始重熙四年三月立皇后蕭氏卽仁懿皇后也然遼史於景福元年
重熙元年俱不載立后廢后之事蓋闕書也今從后妃傳并書之

己丑以杜衍權判吏部流內銓先是選補科格隸

長主判不能悉閱吏多受賕出縮爲姦衍旣視事卽

敕吏取銓法問曰盡乎曰盡矣乃閱視具得本末曲折明日曉諸吏無得升堂各坐曹聽行文書銓事悉自予奪由是吏不能爲姦利居月餘聲動京師後改知審官院其裁制如判銓法以知蘇州左司諫范仲淹爲禮部員外郎天章閣待制太常禮院言侍御史劉夔請去莊獻明肅太后莊懿太后所加太字蓋入廟稱后繫於夫在朝稱太繫於子然二太后奉安別廟準禮應加太字帝以夔不習典故詔本臺諭之乙未賜毫秀濮鄭四州學田各五頃丁酉置國子監直講一員兼領監丞主簿事戊申出宜聖殿庫真珠付三司以助經費詔權停貢舉夏四月甲寅朔遼主如涼陁丁巳李照言奉詔製玉律以候氣請下潞州求上黨縣羊頭山秬黍及下懷州

河內縣取葭莩從之己未詔翰林學士承旨章得象天章閣待制燕肅與翰林侍讀學士馮元詳定刻漏始李照既鑄成編鐘一虞以奏御遂建請改制大樂取京縣秬黍累尺成律鐘鑄審之其聲猶高更用太府布帛尺爲法乃下太常四律照自制律管以爲十二管定法戊寅命馮元聶冠卿宋祁同修樂書冠卿新安人錄曹修古之姪觀爲試將作監主簿仍聽爲修古後五月甲申朔詔曰王者奉祖宗尙功德故禋天祀地則侑神作主審諦合食則百世不遷恭惟太祖皇帝受天命建大業可謂有功矣太宗真宗二聖繼統重熙累洽可謂有德矣其令禮官攷合典禮辨崇配之序定二祧之位中書門下詳閱以聞庚寅禁縷金爲婦人首飾李照上九乳編

鐘圖鐘舊飾以旋蟲改爲龍井自剋八音新器又請

別鑱石爲編磬

辛卯命內侍挾樂工往淮陽軍治

磬石照又言旣改制金石則絲竹匏土草木亦當更

治以備獻享乃鑄銅爲龠合升斗四物以興鐘鎛聲

量之率及潞州上秬黍照擇大黍縱累之檢攷長短

尺成與大府尺合法愈堅定

甲午廣南東西路並

言蠻獠寇邊高竇雷化等州巡檢許政死之遣左侍

禁雍邱桑懌會廣桂二州都監討捕懌部分軍士盡

禽諸盜還京師樞密使求賂爲改閣門祇候懌不應

吏匿其功狀止免短使而已

庚子從太常禮院議

太祖太宗真宗廟並萬世不遷南郊升侑上帝以太

祖定配二宗迭配

六月辛酉以親郊並侑二聖及

真宗爲不遷主遣官告於太廟

左司諫商水姚仲

孫言伏聞議者欲改制雅樂謂舊律太高裁之就下然或制之未得其精損之必差其度臣聞其所爲率多詭異至如鍊白石以爲磬範中金以作鐘又欲以三神五靈二十四孝爲樂器之飾臣雖愚昧竊有所疑望特詔罷之止用舊樂帝欲究李照術之是非故不聽

先是太常鐘磬每十六枚爲一套而四清聲相承不擊乙丑李照言十二律聲已備餘四清聲乃鄭衛之樂請於編縣止留十二中聲去四清聲鐘則哀思邪僻之聲無由而起也馮元等駁之曰前聖制樂取法非一故有十三管之和十九管之巢三十六簧之竽二十五弦之瑟十三弦之箏九弦七弦之琴十六枚之鐘磬各自取義寧有一於律呂專爲十二之數也鐘磬八音之首絲竹以下受而爲均故聖人

尤所用心焉春秋號樂總言金奏詩頌稱美實依磬聲此二器非可輕改且聖人既以十二律各配一鐘又設四清聲以附正聲之次原其意蓋爲夷則至應鍾四宮而設也夫五音宮爲君商爲臣角爲民徵爲事羽爲物不相陵謂之正迭相陵謂之慢百王所不易也聲之重大者爲尊輕清者爲卑卑者不可加於尊古今之所同也故別聲之尊卑者事與物不與焉何則事爲君治物爲君用不能尊於君故也惟君臣民三者則自有上下之分不得相越故四清聲之設正爲臣民相避以爲尊卑也今若止用十二鐘旋相考擊至夷則以下四管爲宮之時臣民相越上下交戾則陵犯之音作矣此甚不可者也其鐘磬十六皆本周漢諸儒之說及唐家典法所載欲損爲十二惟

照獨見臣以爲如舊制便帝令權用十二枚爲一格
且詔曰俟有知音者能攷四鐘協調清濁有司別議
以聞 丁卯出內藏庫紬絹百萬下三司市糴軍儲
己巳以都官員外郎曹修睦爲侍御史修睦修古
弟用中丞杜衍薦也 辛未御崇政殿召輔臣觀新

樂

秋七月壬午朔遼主獵於黑嶺因過祖州白馬

山見齊天后墳冢荒穢又無影堂及灑埽人戶惻然

而泣左右皆沾涕遂詔上京留守耶律贊寧鹽鐵使

郎元化等於祖州陵園內選地改葬其影堂廊庫並

同宣獻太后園陵

〔攷異〕遼史后妃傳仁德皇后附葬慶陵今從契丹國志

遼樞密

使蕭朴進封魏王旋卒贈齊王 甲申詔特賜寇準

謚曰忠愍

戊戌羣臣請上尊號曰景祐體天法道

欽文聰武聖仁孝德表五上從之 庚子侍御史曹

修睦言李照所改歷代樂頗爲迂誕而其費甚廣請
付有司案劾帝以照所作鐘磬頗與衆音相諧但罷
其增造仍詔諭修睦 知杭州鄭回言鎮東節度推
官阮逸頗通音律上其所撰樂論十二篇并律管十
三詔令逸赴闕 八月甲寅宴紫宸殿初用樂 己
巳命李照同修樂書 辛未詔薦獻景靈宮朝饗太
廟郊祀天地自今同日受誓戒始用王曾之言也
甲戌幸安肅門礮場閱習戰 丁丑內出景祐樂髓
新經六篇賜羣臣 己卯以右諫議大夫知兗州孔
道輔爲龍圖閣直學士時近臣有獻詩百篇者執政
請除龍圖閣直學士帝曰是詩雖多不如孔道輔一
言遂以命道輔議者因是知前日之斥果非帝意也
初命朝臣爲江浙荆湖福建廣南等路提點銀銅

坑冶鑄錢公事其俸賜恩例竝與提點刑獄同 九月乙未詔司天監製百刻水秤以測候晝夜 丁酉命李照爲刑部員外郎賜三品服以造新樂成故也起五月造止八月成金石七縣而照自造新樂笙竽琴瑟笛篳篥等十二種皆不可施用詔但存大笙大竽二種而已照謂今篳篥乃豳詩所謂葦管也詩云一之日觶發二之日栗冽且今篳篥伶人謂之葦子其名出此於是製大管篳篥爲雅樂議者嗤之 工部郎中 天章閣待制 劉隨卒擢待制未旬日也隨與孔道輔曹修古同時爲言事官皆以清直聞及是帝憐其貧賜其家錢六十萬 壬寅御崇政殿案新樂詔大臣與觀 賜鄭州學田五頃 初諸王邸散居都城過從有禁非朝謁從祠不得會見己酉詔卽王

珍微宋版印

清昭應宮舊地建宮合十位聚居賜名睦親宅 遼

主如長寧淀 參知政事宋綬上所編修中書總例

四百一十九冊降詔褒諭先是呂夷簡奏令綬爲此

既而謂人曰自吾有此例使一庸夫執之皆可爲宰

相矣 冬十月辛亥朔復置朝集院以待外官之還

京師者 壬子蔡州言左武衛大將軍分司西京石

普卒普倜儻有膽略頗通兵書陰陽六甲星歷推步

之術太宗嘗曰普性剛鷲與諸將少合然藉其善戰

每厚遇之 癸亥復置羣牧制置使仍詔自今止以

同樞密院或副使兼領之 禮院言春秋何休范甯

等註咸謂婦人無武事獨奏文樂前詔議奉慈之樂

有司援舊典已用特磬代鎛鐘取陰數尙柔以靜爲

體今樂去大鐘而舞進干盾頗戾經旨請止用文德